

人

海

記

人海記目錄

小卿媛山館叢書

卷上

漢官給俸

臺省拾遺

內閣墨判

八旗分駐

都下早蔬

沙果

北方無笋

牛象

滿漢兵餉

滿洲考試

旗下莊子

溧陽死地

省陝西絨褐

世祖受賀

順天鄉試官員

滿洲編檢

吏兵月選

順治封誥

改朝鮮印

出纒爲本生喪

西洋生日

回回歲朝

萬歲山白塔

元旦堂祭

四川開科

閘河舟阻

宋獻策

後湖冊

貢士閔落卷

翰林外轉

世祖論宜興

總兵兼銜

定水帶

石鼓字數

于經墓

護駕松

宏光佛閣

鮑公寺白松

秘魔岬古柏

大功德寺

吏部楹帖

西洋畫

海運道里

海運標識

選庶吉士

鹿園

寶坻銀魚

蘆溝橋石獅

人海詩歸 卷三
懋題草

長平公主

續文獻通考

衡衡

惠世揚

節慎庫元寶

左薜石遇害

大隆善寺

于忠肅祠

八功德水

各省湯泉

明朝諸陵

北京廣寒殿

桑乾河塔

煖鋪

蘇州冰廠

堂聯

宋文貞碑

活策情工

大藤鼓

西苑松檜

文廟古柏

天壇榆錢

報國寺矮松

古槐

昌平古槐

樓桑邨

鷹爪稗

採參

大內瓜子

旱金蓮花

各省貢茶

龍生九子

張真人侍兒

龍朝聖書

龍涎香

禁織蟒

脆蛇

八梢魚

布衣獻鱘魚

齊東野語

鷓鴣米

西苑獅

明孝陵享殿

鄭貴妃

周后田妃

徐妙錦

宜興賜死

張敬修遺辭

歲朝春楮帖

戊祭

四明中秋宴

朔望行香

海岱門火藥

二雨辨

日本小歷

石經山藏經

二郎神

泰山之高

飛來峯佛像

入蜀三谷四道

甲申京師之變

中書自經

福藩監國

宏光年號

馬士英屈史

燕京從逆

阮大鍼復用

馬阮孔昭誤國

韓贊周

黃樹

僞太后

劉念臺

宏光演劇

南都選宮

宏光朝謠聯

倪爲丁許

四鎖

戶上書圈

楊文驄

童妃

方國安敗降

士英首逃

金正希

徐冢宰

東明寺異人

洪武科舉

雲貴開科

歲貢恩貢

教習之始

強會試禁

選館樂課

第一場五義

嘉靖禮部條約

正副主考分閱

李九我

殿試策進呈

鄉試差京官

典試差主事

韓敬不達

巡撫監場

斷么絕六

朱文恪主禮闈

廷試誤筆

會元另封進呈

明朝宗室進士

同姓名張銓

莆田科甲之盛

鄉報急足

選歷科程墨

會試同門房刻

一甲三人御批

鄉會試錄序

卷下

滋陽祀宗聖

李襄敏討兆

御史乘轎

朱良育

余有丁

戚少保祠

唐文恪謚

吳文定格言

朱相國氣象

偽書

雲塵將軍碑

宋潛溪集

鄭所南心史

空同刻淵明集

國朝人物編

毀論一炬

刊史糜金

明雋

陳文憲正史

西泠社事

陳植之佳句

嘉靖諸公掠美

藏書之厄

牧齋明史

黃石齋著纂

程奎絕句

人海言 目錄
盧岐嶷引典

李空同文

元字避諱

陳張後裔

鐵券

明制官銜

外國詔敕

選察之首

占籍

學宮易主

征南將軍印

城門禁出柩

入城治喪

宋景濂遷葬

文臣封贈

京師提學

宗伯出身

景皇帝園

建文帝葬處

漕船額數

南京貢船

白糧

松江細布

松江布輸京

誥命移贈

閣臣賜蟒

北京宮殿災

祖宗御容

暹羅貢白象

朱文恪臚傳

傳戴煖耳

韓城坐賍

燈市

襄瓶二百金

殯殿九連

武舉議

元大內

興隆寺八景

北方山藥

大房牡丹

宣德紙

千葉杏

阜城門西寺觀

興勝寺

阮大鍼暴死

馬士英伏誅

南渡三疑案

廷杖

劉李暈狹

顧東江楹帖

殿試不斥落

謚文

明初文臣無謚

李林甫

元祐黨籍

清慎勤

強景明詩

張子醇

奏草毋多毋文

胡廣有愧科名

判葬再嫁婦

掌計不修怨

卻餽茶葉

麥精留客

明武宗祭文

內侍讀書識字

州縣戒石文

世宗忘刻石之言

一榜三忠臣

天子作臣下碑

御史言事關白

左良玉犯闕

楊顧二張交情

楊琳

上羨金

廠衛

安慶設巡撫

請建四輔

王元翰

典試迴避本省

貝勒

蒙古土語

修齋

吏部選郎變例

北京廊房

宮莊子粒

奶子府

明朝藉田禮

棋炒

女驕夫

蓼戶

駕相

大臣賜第京師

講官賜金錢

翰林院積沙

六科廊

銅匱酒榨

捕蝦蟇

三代尙書

十知貢舉

舉人衫

戰具斤兩

不樂爲教官

寶誌達所

聽經樓

附學

謚法

持笏

陰襲巾

射柳

殿試改期

蜂化促織

貓王

改印

外戚封王

走解

六科內府

草料馬數

軍數非外人與知

太子冠禮

瓊林宴盡七杯

秘閣

南內藏書

只孫衣

劉瑾時狀啓

庶吉士呈文

年號犯前代

觸觸築臺

稱老師

京察

試差正副變例

鶴坡楚濱

私鹽之禁

科場例式之始

刊策刊經文

許襄毅上京

分宜時檢討

殿試出榜變例

禮闈女嬰

東直門異

太白經天

引水限馬足

本朝禁中宮殿門名

本朝內監數目

榆莢

湯泉御札

夜光木

猴頭藤菰

蟠木

湯泉上諭

蒙古鹽鐵

口外行宮

塞山毒草

椴樹

細鱗魚

駱駝

帳殿帳房

烏喇奈

蒙古無名水

落葉松

黃羊

虎乙

野猪

熊

鹿

哨鹿

鹿茸

山雉

飛狐

蜥蜴

松瘦

順風耳

空青

塞外山果

戶部西庫書

殿試武舉

開爐節

考督學臣

元旦朝儀

暢春苑直廬

西苑烟火

進士釋褐

聖祖論醫

萬首唐人絕句

經筵

廣仁殿

唐六如水村圖

聖祖算學

鄭世子

十種蒲桃

賜物年例

內府書畫

龍鰲

閱視羣牧

興安至暢春苑站數

沙蓬

蓋草

編檢補科

南宮變局

館選之嚴

丙戌館選

草木可當茗飲

地棋

詞臣帳房

烏喇哈帶東

裁進士牌坊銀

韻府羣玉

明月錢

玉酒海

南海涎

右人海記二卷計三百九十七條吾邑查初白先生著
向未刊行幼時收得一敗帙斷爛叢雜兼多魚豕之訛
思覓善本以相校讐迄不可得藏篋衍者幾二十年比
歲需次楚南旅邸多暇因爲詳加檢閱訂正謬字手自
繕寫以付梓人惟湯泉 御札中有闕文敬謹空白及
明陵添設守備於康熙二十〇年選歷科程墨錢唐人
錢穀〇試差正副變例侍〇羅萬化阿哥下太監六十
〇雍安嶺上多白沙故名〇〇數條內缺字特援夏五
郭公之例未及考證良慙淺陋博雅君子幸進而教之
咸豐元年歲次辛亥海昌張士寬識於長沙客舍

人海記目

人海記卷上

海昌查慎行悔餘編輯

同邑張士寬柔之校刊

蘇子瞻詩云惟有王城最堪隱萬人如海一身藏與東
方曼倩陸沉金馬之意略同余自甲子夏北游太學又
九年舉京兆秋試又十年唱第南宮其後供奉 內庭
者七年從事書局者三年迨癸巳夏移疾乞歸年已六
十有四矣通計三十年來客居京師歲月過半其間耳
目聞見隨手綴錄零丁件系不下數百條雪窗檢點裒
集成卷命曰人海記

漢官給俸

本朝初年滿洲官員支俸不支薪漢官則俸薪並支順治甲午停秋冬二季俸有以停俸不停薪請支折薪銀者以薪侈於俸也如四品官季給薪三十金俸纔二十金耳內院不許謂滿洲方在此論薪俸何得濫也明年漢官但給俸不給薪矣朱右君司空云

臺省拾遺

故事舉行計典後臺省例有拾遺順治丙戌部院大計羣吏止據撫按所揭以黜陟臺省欲循故事內大臣不欲也陳溧陽力主之

溧陽陳名夏

國初拜相臺省拾遺奏上多被反坐己丑大計

鑒前事雖有糾拾亦僅耳其後遂停吾邑楊少司馬雍正爲副憲時復請舉行拾遺格於部議不果督撫之權漸重矣

內閣墨判

內閣判日俱用墨筆以票旨硃筆選尊也此制起於明朝但外而九列至斗食之吏皆硃批獨不嫌僭上何也

八旗分駐

八旗官兵內城分駐之地 國初各有地界正黃旗則正陽門鑲黃旗則東直西直二門正藍旗則宣武門鑲藍旗則崇文門正紅旗則德勝門鑲紅旗則阜城門白旗則朝陽門齊化門鑲白旗則安定門

都下早蔬

漢大官園種冬生韭葱菜茹晝夜燃藊火待溫氣乃生事見漢書召信臣傳今都下早蔬卽其法蓋明朝內豎不惜厚直以供御庖嘗聞除夕市中有賣王瓜二枚者內官過問其價索百金許以五十金市者大笑故噉其一內官亟止之所餘一枚竟售五十金而去

沙果

吾鄉呼林檎爲花紅北人呼爲沙果又奈似林檎而小北人曰虎喇檳

北方無筍

北方無筍惟冬筍用茅竹筒封貯從江南馬上販鮮十餘日到京每斤價直四五百錢春夏之交食蘆蒲芽總名爲筍詩云維筍及蒲則蒲與筍故當有別

牛彖

佐領卽牛彖也秩如明朝千戶專管戶籍秩雖卑凡位居公侯伯者並俯聽其派撥亦猶縣令之轄鄉紳

滿漢兵餉

滿洲八旗騎兵月餉七兩五錢步兵三兩四錢綠旗騎兵月二兩步兵一兩五錢城守兵月一兩水司同達月小盡扣銀五分謂之朋椿官馬斃則以此項買補凡騎兵止給官馬鞍

舊自備

滿洲考試

滿洲子弟入學倡於順治辛卯壬辰時范文程當國初試百
四十人入庠歲考止三等上者資絹二疋其赴科舉初場止
二義廣寧楊方興山陰沈文奎並解元麻勒吉爲狀元麻勒吉後
改名馬另爲一榜戊戌以後乃列名漢人榜間亦有成七義
者矣戊戌以後地北偶談
作庚戌癸丑以後

旗下莊子

初徙八旗圈順天永平保定河間之田凡腴畝善宅俱歸旗
下謂之莊子順治癸巳以水災四府莊子俱荒欲改圈眞定

順德廣平大名地戶部持之不行

溧陽死地

溧陽相國以甲午三月賜死時年五十宣武門內靈官殿乃杜郵之地也

省陝西絨褐

陝西織造絨褐 本朝初年設有專員順治辛卯始省以此項錢糧充餉

世祖受賀

世祖章皇帝於甲申十月朔入燕甫七歲是日一御殿自後元旦萬壽卽俱免朝賀至庚寅正月朔始御殿受賀

順天鄉試官員

順天鄉試初用考試官四員內滿洲二人主八旗蒙古應試者後止二員並用漢人

滿洲編檢

滿洲編檢視漢臣俱晉一品而於滿人爲卑以滿官止七品也

吏兵月選

吏兵二部每月選期舊於天安門外兩廊設矮几鋪紅毡席地而坐尙書二人正面吏部西向兵部東向侍郎傍列其餘司官筆帖式以次排比選人於前唱名掣籤今兩廊列牆屋

各官皆露坐

順治封誥

順治甲午正月始頒文武諸臣制誥封贈八旗勲衛數萬人其祖父之名類皆闕失意不欲制詞漢官力爭之於是內院擇坊局史官十六人分撰自一二品始一品限十二句二品十句三品八句句各四字不用故實

改朝鮮印

順治癸巳三月廿五日改鑄朝鮮國王印兼滿漢文以從前止漢篆也

出繼爲本生喪

人海記

卷上

出繼之子離任爲本生父母治喪自北平朱右君諱之弼先生始先生時官戶部侍郎其後大臣遂援爲例

西洋生日

西洋人生日不論本誕如立春日生其日無定期或十二月或正月遇此節卽是也

回回歲朝

回回人雖在中國不奉正朔自有回回厯不限十二月爲一年別有歲朝每年不同己丑八月初三日爲羣聚慶會之期余在都下親見之

萬歲山白塔

皇城西苑萬歲山上以西僧言建白塔三層形如瓶按元世祖至元二十八年五月丁巳從楊璉真伽之請於臨安建白塔二各高一丈二尺以居咒師朶四的性吉等七人其事本此

元旦堂祭

每歲元旦昧爽未謁 太廟先上堂祭乃鄧將軍廟也在朝門之巽隅庭列劍戟自 車駕外侍從皆匍匐而入非親暱者不得隨行按鄧諱子龍南昌人萬厯中副總兵

四川開科

四川開科始順治辛卯解額七十二人喪亂之後舉子止二

百餘人主司駐保寧寓試道士院時有亭溪之警急於竣事
二三場併日

開河舟阻

開河舟阻官舫於總河處求給讓行牌以先商賈今無此例
矣

宋獻策

永城人宋獻策明末賣卜燕市遇李自成拜國師導之入都
自成敗後滿洲重其術隸旗下其人至康熙初年乃死

後湖冊

南京後湖貯各省戶口田糧冊有明終始計一百七十萬本

南渡後用以造甲點火藥至 本朝僅存萬歷間及崇禎五年者朝議謂每本四五斤驚之可得四五萬緡

貢士閣落卷

貢士閣落卷自順治乙未始時禮科議南卷十中其一而江西僅七人物議藉藉於是大總裁金之俊等奏落卷貯於順天府許貢士赴閣限六日內不得領回前此未之聞也

翰林外轉

翰林外轉順治乙未九月始行之編檢則范周沈荃盧高湯斌耿介崔之瑛馬燁曾等少詹以下開坊以上則黃志遴楊思聖王舜年藍潤王无咎陳燝等共十八人皆以品行清端

才猷贍裕各照外轉陞一級遇缺卽補康熙戊辰編檢汪楫
丁廷樾李濤三人以知府用辛未冬少詹徐潮轉通政司侍
讀吳會恩轉光祿少卿侍講熊賜瓚轉大理寺丞高裔勵杜
訥俱轉通政叅議官坊李應薦轉太常少卿周清源轉叅議
司業吳涵轉叅議

世祖論宜興

世祖常言明朝之亡由周延儒馮涿州少子娶宜興從女初
頗爲解上不以爲然又問延儒有子官翰林今安在銓跪對
曰庚吉士周奕封非延儒子也時奕封請假在籍乙未秋還
朝俄除知縣乃涿州希旨外之也

總兵兼銜

各鎮總兵官銜帶都督同知或僉事在明朝有五軍都督府故也今都督府已裁而總兵仍兼此銜甚屬無謂

定水帶

正陽門外窮市有古鐵長三寸許衡二寸形若革帶中空外鑄而背隱起釘如鼓不甚可辨一日高麗使見之售以五十金云此定水帶也禹治九州作九帶此其一也若航海之水鹹不可飲投以帶立甘冽故貴耳市中好事者隨至會同館汲苦水石餘投鹽數斤揉之使濁乃投帶於中沸涌作魚眼數十少頃味極甘冽

明季事

石鼓字數

太學石鼓文舊六百五十七字元至元中存者三百八十六字今所存字但三百二十五而已

于經墓

西山碧雲寺俗名于公寺寺後爲正德大璫于經墓土木華麗凡賜祠五多耐冢中央豐碑二道正面無文其碑陰詳刻魏忠賢爵里姓名意殊駭詢之守僧云忠賢名下蘇應宣或萬九嘗被掠於建州從本朝入燕葬其衣冠於此余憤甚直前洩之時與朱大司空同游公不以我爲狂也按碧雲寺忠賢重修天啓三年少師葉向高撰記禮部尙書曾稽錢

象坤篆額今碑磨去象坤姓名意作相時事也福清記中亦頗稱許魏氏

護駕松

香山永安寺來青軒額明神宗手書軒之前有山突起金章宗祭星臺也下有護駕道松覆之稱護駕松今尙存其一

宏光佛閣

宏光寺在香山絕頂永樂間太監鄭和建和朝鮮人四使本國中有佛閣形圓而八觚云東國之制

鮑公寺白松

去香山二里許爲鮑公寺亦內官墓中有白松八株圍皆三

抱掩映殿宇人行其下衣上不見日色

秘魔崖古柏

廬師山清涼寺中秘魔崖古柏一株長可尺許橫出石縫不彫不榮云廬師手植也石經山亦有古柏一萬歷初上過之御書靈根古柏四字

大功德寺

大功德寺舊名護聖寺直金山口與景陵相近宣德朝雪峯大覺禪師駐錫於此宣帝御賜詩當年天下選高僧獨取尊師第一名卽指雪峯也園陵自景皇帝外又有懷獻悼恭哀仲莊敬憲懷獻懷悼懷故太子七衛許忻申蔚岳景穎戚薊

均靖邪簡懷悼故王十六殤主二十六仁宗妃三宣宗妃一
英宗如憲宗如十二按史皆葬金山與景陵相屬凡五十三
園今不可別識矣

談孺木

吾邑談孺木先生留心明朝典故不以詩名然其北游集中
如過文信公祠七律一聯若云丞相宜全節敢謂書生合出
山過陳溧陽里第云往事恩仇虛偃月新編賢否總銷魂陳
餘刻頸交何在范蠡扁舟事可行過惠安伯張氏墓云翁仲
似人能化石杜鵑本鳥不離枝贈王元照太守云縱寫青山
非舊日翠微雲亂夕陽中過梅村先生值金壇王友三感舊

云衣冠王謝多何益門戶胥原大可憂南宋朝廷終覺小中原經濟亦難尊贈湯道末太常云休屠祭後全非像博望歸時不待槎除夕云春兼臘月人歸少寒倍燕京客受多如此之類皆名句也

吏部楹帖

吏部楹帖明萬歷初冢宰錢塘張瀚立功名身外事大就何妨小就何妨富貴眼前花早開也得晚開也得

西洋畫

西洋畫以胡桃油清絹抹藍或綠或黑後加采焉不用白地

海運道里

海運道里詳梁太宰夢龍集中自淮安府至安東縣九十里
安東至馬洛關五十里馬洛至蘆浦四十里蘆浦至楊寨四
十里楊寨至白沙關二十里白沙至雲梯關二十里雲梯至
淮河套六十里淮河套至大海東洲山百二十里東洲山至
高公島三十里高公島至鷹游山三十里鷹游山至盧溝所
十五里盧溝所至青口六十里青口至興莊五十里興莊至
東流所一百里東流所至濤洛場三十里濤洛至信陽場百
二十里信陽至齊堂島四十里齊堂至靈山島九十里靈山
至竹槎島五十里竹槎至浮島四十里浮島至灣島六十里
灣島至鼇山管島三十里管島至田橫島七十里田橫島至

欽島十里欽島至青島百二十里青島至海洋所灰島七里
灰島至炕兒島十八里炕兒至元城島百二十里元城至雙
駝埠二十里雙駝埠至寧津所八十里寧津至成山衛五十
里成山至青雞島六十里青雞至羅山所五十里羅山至威
海衛四十里威海至劉公島五里劉公島至寧海州七十里
寧海至空空島五十里空空島至奇山所三十里奇山至海
山縣三十里海山至登州新海口八十里新海口至沙門島
六十里沙門至桑島五十里桑島至萊州岬岬島四十里岬
岬島至三山島八十里三山島至芙蓉島五十里芙蓉島至
海倉一百里海倉至魚兒鋪十里魚兒鋪至白浪河五十里

白浪至八溝河五十里八溝至小清河二十里小清河至清河五十里清河至絲網口十里絲網口至江埧十里江埧至大口子四十里大口子至大清河十里大清河至唐頭寨十里唐頭寨至小沙河五里小沙河至渾水汪十五里渾水汪至降河三十里降河至久山河十里久山至大沙河二十里大沙河至泊油河十五里泊油河至套河十五里套河至沙頭河十里沙頭至大溝河三十里大溝河至桑甸河三十里桑甸至徐家溝十里徐家溝至乞溝河七十里乞溝至大沽河二十里大沽至天津衛一百五十里天津至張家灣一百八十里通計淮安至張家灣海道水程共三千三百九十里

海運標識

隆慶辛未海運初雇海鵬船五隻分載米二千石每駕船十
二人自淮安至天津試運無碍海道灣泊舟行停泊宜在舊
設墩上晝設旂幟夜懸燈籠以便趨集嘗攷平江伯陳瑄督
海運於靈山建烽火臺高三十餘丈今宜師此意多爲標識
云 東林雜組

選庶吉士

大明官制一書不載翰林院庶吉士蓋官制定於洪武年間
而庶吉士則始於永樂二年甲申也似宜補入按永樂二年
三月己酉選庶吉士楊相等五十人並習文湯流王英等十

人並習書四月甲申進士沈升等俱改庶吉士修書五月辛丑諸司辦事進士能書者曾慎等二十九人爲庶吉士一科凡四選

鹿園

崇文門外二里大通橋東園舊參鹿處地平如掌漫衍可數里名鹿園

寶坻銀魚

寶坻銀魚似吳中鱸餘而大倍之出海中船山下霜降後沂流而上育子諸淀中夏霧映日波浪皆成銀色土人候其至網之瓦甬頭出者最佳明朝命內監提督冬月抱子以冰進

縣設六廠漁戶一百七十人歲進凡七次

蘆溝橋石獅

蘆溝橋石獅兩行共三百六十八

懋題草

石經山在房山縣西南四十里生懋題草他處所無

懋古莎字前漢

地理志有懋題縣

長平公主

長平公主崇禎周后所出甲申春年十五議降周太僕某子世顯將築館遭國變帝以御劍斫右臂斷腕賊以貴主已殞授屍國戚五日復甦順治二年公主上書願皈依空門上

不許詔求元配周世顯應詔起卽故武清侯之第賜金錢牛車莊一區田若干頃俾成禮時乙酉六月上浣也明年丙戌八月十八日薨年十七詳華亭人張宸記事及吳梅村集中孫侍郎承澤春明夢餘錄則謂公主甲申年十五傷右臂肩際明年乙酉九月成婚丁亥年卒年月互異不知孰是公主名徽
妃見春明夢餘錄

續文獻通考

華亭王圻續文獻通考藝文類中載琵琶記樂府水滸傳又明朝宗室鄭趙襄荆淮滕梁衛八王並仁宗子而云成祖子其誤尤甚

衡衡

京城各巷曰某衡衡其義無所出謝肇淛五雜俎曰閩中方言家中小巷謂之弄南史東昏侯遇弒於西弄卽巷也元朝經世大典謂之火街後因訛爲衡衡

惠世揚

惠世揚米脂人萬歷甲辰進士歷刑部侍郎李自成故牧卒也嘗給事世揚之家及僭號諸人曰得惠先生來則甚幸因致書世揚卽至拜右平章時左平章則牛金星也自成敗從本朝兵入燕三年不見用後放歸綏德副總兵王永強作亂叔世揚從軍敗於朱原鎮永強自縊世揚不知所終

東林雜俎

節慎庫元寶

北京戶部節慎庫金銀元寶各一蓋鎮庫之物以梯登其上其邊尙高於人上刻永樂九年

左蘿石遇害

左蘿石

懋第

北使被幽宏光敗報至攝政王使人宴左侍郎

飲酣語曰此太平宴也左問所自曰江南破矣左悲不自勝仆席於地作絕命詩閏六月十八日遇害都人吳某收殮同時被難者五人其一則兵部司務加職方主事崑山陳用極也

棗林雜組

大隆善寺

姚廣孝諡恭襄初從祀太廟嘉靖中移大隆善寺故元崇國寺也今斥爲馬廐

于忠肅祠

崇文門內舊有于忠肅公祠萬歷乙未二月己未敕建額曰忠節 本朝順治中公像被毀吾邑人談孺木作弔于太傅祠文以憫之今相傳爲京師城隍神

八功德水

南京靈谷寺琵琶街側有池曰八功德水今涸按八功德水見佛書在天竺國一清二冷三香四柔五甘六淨七不噎八除病

各省湯泉

各省俱有湯泉北直十三江南十三山西十一山東十七河南十陝西十四江西十七湖廣十六四川八福建六十一廣東十五廣西三雲南十八浙江三貴州二大抵其下有白礬丹砂硫黃三物乃蒸爲煖流後周王褒溫泉銘云白礬上徹丹砂下流明廣陵桑喬云雷火所灼其氣亦硫蓋極陽之氣也

明朝諸陵

明朝諸陵孝陵

太祖

在應天府朝陽門外鍾山懿文太子祔葬

於側曰東陵長陵

成祖

在昌平州城北天壽山自紅門進御道

凡二十餘里舊名東祚子山永樂七年卜建改名天壽後視

高山數十重來龍不斷明堂平闊祔葬十六如獻陵宗仁在長

陵右祔葬四如景陵宣宗在長陵左祔葬七如裕陵英宗去昌平

二十五里獻陵之西祔葬十八如茂陵憲宗去昌平二十七里

裕陵西北祔葬十四如泰陵孝宗在茂陵西無祔康陵武宗去昌

平三十五里泰陵之西九龍池環其前永陵世宗去昌平十八

里長陵之東南兵部侍郎餘姚駱用卿所擇祔葬如三十嬪

二十六昭陵穆宗定陵神宗在太峪嶺徐尙書學謨所擇時通政

司叅議梁子琦等難之爲輔臣申時行王錫爵所斥崇禎初

尙書姚思仁督理多朽石吾邑陳與郊以給事中巡工言壽

宮五室中三間待御四隅維以鐵索各大銅缸注油左右室
通門待中宮及嗣帝所生母升祠神廟闕壽宮自坐石室飲
酒慶陵光宗熹德陵宗熹石橋高不五尺長不五丈砌石無多而耗
二十萬金且陵地窄甚僅當兩山之腋在永陵左砂相距不
百步也思陵懷宗在紅門西三里與諸陵隔河諸陵在河北思
陵獨在河南卽故皇貴妃田氏園諸陵明樓俱有碑題某宗
皇帝之陵棧恩門內有碑俱無字閑以木柵 本朝入關惟
定陵獨被燬餘仍令太監守護康熙二十口年添設守備一
員

北京廣寒殿

皇城北苑中有廣寒殿相傳遼后梳妝樓成祖定鼎北京詔勿毀以垂鑒戒萬歷七年五月四日樓傾梁上金錢百二十文云至元通寶則樓崩於元初非遼時物矣

張江陵雜著

桑乾河塔

涿州桑乾河中有塔名鎮河嘉靖元年塔崩內有古錢皆飛空如蝶自後河水不時泛溢

涿州志

煖舖

都御史葉盛巡撫宣大於沿邊孔道俱設煖舖卽唐人邊舖也

蘇州冰廠

蘇州冰廠明季已有之凡十六所 本朝兵始至問廠何爲
曰藏冰者謂伏兵也焚其五始悟

堂聯

一品榮歸日雙親未老時

嚴文靖公堂聯

無毀無譽三代直道而行

知止知足四時成功者退

申文定公堂聯

財不求贏敢爲子孫益過

位常踰分當思齒德難兼

陸五臺聯

觀此足見盛世精神氣象

宋文貞碑

沙河縣宋文貞公

環

碑斷沒土中正德丁丑縣令方思道治

鐵二百斤貫而續之今尙存不甚剝蝕德清談未庵宰此邑

曾以捐本見貽

活築情工

保定有定霸城宋楊延朗所築金時以其磚他用其土基尙存嘉靖中霖雨漬城西北隅得人骨數十具植立土中髑髏各戴堞堊旁倚兵仗石刻云活築情工百戶徐瑾一行兵役見者悚然

長安客話

大藤鼓

成化初韓襄毅雍南征平大藤峽賊斬大藤中空鞞革爲鼓置叅府前聲震數里兵使某移於行臺扣之無聲移歸故處聲復鳴

西苑松檜

京師皇城內西苑古檜一松四並金時植嘉靖中封松爲指
揮使其俸米專飯孤貧

文廟古柏

國子監文廟古柏並元許文正公手植

天壇榆錢

京師外城天壇坳榆錢凡榆春錢獨天壇之榆以秋

報國寺矮松

報國寺舊有矮松二株其右尤奇幹長不過數尺而枝橫數
丈文人往往觴詠其旁自內城城隍廟市移於此每月三度
爲棊馬之具數年無復存矣

古槐

槐樹斜街卽土地廟斜街舊時古槐夾路今每月逢三日爲市集槐亦僅有存者

昌平古槐

昌平州天壽山古槐相傳竇禹鈞家物樹中枵可布三五席稱竇家槐按禹鈞周之諫議大夫也故居在薊州城東今其地尙有竇氏莊

樓桑村

涿州西南十五里樓桑村昭烈故居按本紀道右有大桑高十丈如羽葆乙丑二月同楊崑木游此覓土人爲鄉導至則

顏垣破廟間所謂樓桑無能指其處者廟創於唐乾寧五年
先主像與關張並列

鷹爪稗

三峽產雲南稗一名鷹爪稗播種畦植與五穀爭價他處所
無也

採參

遼陽東二百餘里山深林密不見日色下產人參其苗高出
百草之上採參以夏五月裹糧披榛而入或迷徑爲虎狼所
噉或人相遇弱者死强者攫所有而出以地近 皇陵恐傷
龍脉通者撿參之禁甚嚴罪至殊死而趨利之徒輕生不顧

也

大內瓜子

大內多異物歲一閱視出之庭有瓜子長五六寸闊如之不知何地所產袁貴如父祐說

見楊士聰玉堂薈記

旱金蓮花

旱金蓮花五臺山出瓣如池蓮較小色如真金曝乾可致遠初友自山西歸有分餉者以點茶一甌置一朵花開沸湯中鮮新可愛後扈從出古北口外塞山多有之開花在五六月間一入秋莖株俱萎矣

各省貢茶

各省歲貢芽茶共四千二十二斤內江南宜興縣百斤六安

州三百斤廣德州七十二斤建平縣二十五斤浙江長興縣

三十五斤即片茶納南京嵯縣十八斤會稽三十斤永嘉十斤臨安

二十斤富陽二十斤龍游等縣共二十斤慈溪二百六十斤

宋置茶局進貢元明因之麗水二十斤金華十二斤臨海等縣共十五斤

建德五斤淳安五斤遂安壽昌二縣共六斤桐廬二斤分水

一斤江西南昌府七十五斤南康府二十五斤贛州府十一

斤袁州府十八斤臨江府四十七斤九江府百二十斤瑞州

府三十斤建昌府二十三斤撫州府二十四斤吉安府十八

斤廣信府二十二斤饒州府二十七斤南安府南康縣十斤

湖廣武昌府六十斤岳州府湘陰縣六十斤寶慶府邵陽縣
二十斤武岡州二十四斤新化縣十八斤長沙府安化縣二
十二斤寧鄉縣二十斤益陽縣二十斤福建建寧府建安縣
一千三百六十斤內採春二十一斤先春六百四十三斤次
春二百六十三斤紫筍二百二十七斤薦新二百一斤崇安
縣九百四十一斤內採春三十三斤先春三百八十斤次春
一百五十斤薦新四百二十八斤淮南宋時蘇州茶額六千
五百斤元無額明納錢三百十九萬三千有奇 成化三年
南戶部奏准供用庫歲用芽茶坐派池州府三千斤徽州府
三千斤茶葉徽州府三千斤蘇州府三千斤滁州府三百斤

徐州二百斤和州三百斤廣德州三百斤 四川茶園十株
取一徵茶二兩茶四十斤易蕃馬一匹李文忠以茶五十餘
萬斤易馬一萬三千五十八匹今茶課本色十五萬八千八
百五十九斤係石泉建始長寧等縣并建昌天全烏蒙鎮雄
永寧九姓土司辦納 陝西茶課今五萬一千三百八十四
斤係興安紫陽石泉漢陰西鄉歲辦 宋元時貢芽茶以建
安爲上明朝不貢閩茶卽貢亦備宮中浣濯甌盞之用貢使
率貢銀抵京買納間有采辦亦取諸延平非武夷也延平人
呼製茶者曰碧豎

龍生九子

龍生九子蒲牢好鳴囚牛好音螭吻好吞嘲風好險睚眦好
殺翬屬好文狸狌好訟狻猊好坐霸下好負又博物志憲章
好四饕餮好水蜥蜴好腥蟾蜍好風雨螭虎好文采金狔好
煙椒圖好閉口蚶蚶好立險鰲魚好火金吾不睡皆龍種也
張真人侍兒

平湖徐在中以工部郎分司張秋張真人舟過其侍兒膚貌
清麗徐見而謹之真人曰先生宜自重此某地龍也徐不信
命進盤水侍兒躍入雷雨應時而作

龍朝璽書

萬歷己卯行人謝燕使琉球航海颶風作大雷雨有二龍挂

於檣上一長年曰此來朝璽書耳急扶燕書免朝二字示之
卽退

龍涎香

龍涎香出蘇門答刺國其國西有龍涎嶼峙南巫里洋洋中
羣龍交戲其上遺涎焉國人駕獨木舟伺采之每一斤其國
值金錢一百九十二枚准中國銅錢九千文嘉靖二十四年
下戶部取龍涎香百斤徧市不得廣東藩司購每斤懸價千
二百金僅得十一兩進內驗不同仍亟取真者廣州獄囚馬
那別的貯有一兩三錢上之黑褐色密地都密地山夷人繼
上六兩白褐色細間狀云黑者采在水白者采在山皆真不

廣尋有密地山商再上通計共十七兩二錢五分次年進內
辨驗是真自後夷船稍稍挾來定價每兩售百金其爲用入
香合和能歛腦麝清氣數十年香味仍在焚之翠煙裊空不
散涎沫有三品一曰泛水二曰滲沙三曰魚食泛水輕泛水
面涸人伺龍出隨取之可入藥用滲沙則凝積多年滲沙中
魚食則化糞散於沙上皆不中用而魚食有二種海旁有花
若木芙蓉者春夏間盛開花墮海中大魚食之或先食龍涎
則腹中脹滿昂頭向石上吐沫乾取可用惟糞者不佳

禁織蚌

宏治元年左副都御史邊鏞奏禁織蚌云爾雅蚌者大蜃也

蟒無角無足龍則角足具今織蟒俱龍非禮請禁之

脆蛇

脆蛇出崑崙山聞人聲卽寸斷人伺其斷鉗取之須寸各異處待風乾人藥若少頃無人聲寸寸仍續成蛇主治色癆及驚疑喪膽諸症本草方書不載

見玉鏡新談

八梢魚

八梢魚灰褐色無鱗腹圓口生腹下後極八尾產遼東海中永平太守盧騰龍以餽明相國庖人來詢無治之法余亦不知也以意答之用滾水煆去其皮其尾如猪小腸而色較白寸斷之用葱韭雜炒及登盤鯉氣觸人不堪下箸而一統志

載入遼東物產太守以充土貢何所取也

布衣獻鱗魚

通州人葛原六以布衣獻鱗魚百尾時用法嚴或阻之原六笑曰爾不上食父母耶君猶親也庸何傷及至上召問曰魚羹何如對曰臣未進不敢嘗也上大悅命賜酒食仍還其一曰勞汝其後歲進至九十九尾著爲令

棗林雜組

齊東野蠶

永樂時山東進野蠶絲製裘薦太廟羣臣稱賀令齊東山谷處處有之與家蠶等蠶月浴種出蛾散置樹上聽其眠食食柎葉者名柎紬食椿葉者名椿紬食板葉者名板紬野人伺

鷓鴣廬其下手長竿逐樹按行爲禦鳥鼠其穰者春夏秋歲
三收焉有一種鷓鴣之小者作繭堅如石大才如指頂在深谷
叢林間不關人力樵牧遇之收曰山繭

鷓鴣米

弋陽汪少宰偉嘗赴中官席飯僅半甌香滑而膏異於常產
問所出則蜀中歲進其米生於鷓鴣每尾止取二粒放去明
年仍可取也

西苑獅

西苑獅日食一羊西域胡人主之白布纏首金帶衣綠食三
品料

明孝陵享殿

明孝陵享殿太祖高皇后南面左淑妃李氏生懿文太子秦愍王晉恭王次皇妃某氏生楚王魯王代王郢王齊王谷王唐王伊王潭王又次貴妃某氏生湘王肅王韓王藩王又次貴人某氏生遼王又次美人某氏生寧王安王俱東列碩妃生成祖獨西列見南京太常志孝慈皇后顯然無子而昇州別集同姓諸王表自懿文成祖外秦愍王棟晉恭王樞周定王橚俱母高皇后吾學編亦然與志不合不可解也

鄭貴妃

鄭貴妃父承憲貧甚以女許孝廉某爲妾臨別悲慟孝廉憫

之遺還不責聘鄭感其意脫隻履與孝廉矢報已而入宮大
得幸念前事而忘孝廉名命小璫售履於市索直若干無應
者時孝廉計偕聞而往合其履如泣告於上曰非若人妾不
及執巾櫛矣亡何孝廉謁選得善地歷官鹽運使貴如後生
福王常洵有如意之愛上書其名於金盒屬如藏之約他日
以爲東宮辛丑十月皇長子受冊如持盒泣訴之上啓書字
俱蝕嘆曰此天也如卒後謚恭恪惠榮和靖皇貴妃

周后田妃

孝節貞肅淵恭莊毅烈皇后周氏父奎蘇州人微時寓京師
寄食爲人筦庫元配生子鑑繼丁氏生子某及后信王選如

后與焉信邸入正大位后生東宮及定王貴妃田氏生永王
及悼靈王貴妃寵日甚意圖奪嫡一日永和宮婢貴妃居於永和宮於
金梭狻下誤觸定王中宮銜之每上召貴妃如例御鳳輿小
璫昇之是日昇以宮婢上問故曰小璫多恣肆無狀叩其實
曰聞坤寧宮小璫狎宮婢故遠之耳上色動而搜其處大得
狎具蓋宮人各侶其璫所謂對兒也一名對食上驟怒立譴
諸小璫中宮因懟恨成疾嘔血有老宮人曰田氏宮中獨無
對兒乎亦可搜也已而果然上疑始釋都督田宏遇聞之大
恐嗾貴妃如上章引咎上意解令省愆例閉中門從旁門出且
以章示中宮明無嫌也其章出御史湖南劉興祥手蓋宏遇

所囑云貴妃薨明年春宏遇復進少女年十三見寵欲卽進封司禮太監某言某貴妃以選入非外進也乃止賜珠簾等物亂後貴妃妹走天津珠簾仍在後爲朝士某妾 按田貴妃名秀英其妹名淑英

徐妙錦

徐中山第三女名妙錦文皇欲娶爲繼后女不可因不嫁而爲尼嘗論草除事建文君當坐殿上燕王至苟不讓則死何必自焚竄每語遜國事未嘗不痛哭也

宜興賜死

崇禎十六年五月大學士周延儒放歸復見徵知不利求解

於中宮賂嘉定伯周奎十萬金達之中宮請授指東宮東宮
每晨謁及是啓曰近來久不見周先生何也上曰爾何自知
周先生答曰父皇嘗稱周先生故知之上曰此非好人今不
得稱先生上心知其奸尋賜死其日黎明錦衣同法曹至私
第排闥而入家僮各驚匿周求青衣未得緹校脫而衣之拜
命飲泣求筆墨占句倉皇不屬使者促之投筆就縊

張敬修遺辭

萬歷十二年故太師張居正子禮部主事敬修自縊遺辭其
略云五月初三日卽侍郎至府初四日卽差官提敬修面審
大意坐先公以二百萬家貲又要攀承天夷陵本縣三家坐

曾確庵家寄銀十五萬坐王少方家寄銀十萬兩坐傅大川
家寄銀五萬兩只得從當事之意料三家斷不能完結此事
吾日後何面目見之又以母子叔姪恐團聚一處有串通之
弊於五月十一日出牌迫令隔別不得接語幽四倉屋風雨
蕭蕭清草鳴蛙無不助余之悲悼遭時如此已無生路不得
已託言片楮以代剖心此書送各司道一目五月十日寫完
以期必遂而夢兆稍吉不果至十三日各欽差上司會審叔
姪俱嚴刑拷訊父母遺體平生眼不見刑具脆薄之軀豈能
勝之此數之莫可逃也任巡按活閻羅你也有父母妻子之
念何忍殺人媚人如此之酷烈也有便乞傳山西蒲州相公

說張門事已完結矣無煩望念願你輔佐聖明天子於億萬年也云云按邱侍郎名樞齊人懸貶酷拷貽楚患數年卒無子任巡按名須更考

歲朝春楹帖

康熙乙丑年元旦立春有大老署門云歲朝春百年難遇聖天子萬壽無疆按崇禎元年元旦立春陳眉公用此聯作楹帖

戊祭

郊上辛社稷上戊文廟上丁戊在丁後故先丁如十日丁則一日戊當先戊而後丁宏治間吏部主事楊子器上言戊從

初十之丁則次戊非上戊也時無諳禮者竟寢不行

李崆峒

四明中秋宴

四明中秋宴飲以八月十六日相傳史彌遠官臨安還家度節沮風是夕始到遂沿爲俗葉業師云

朔望行香

洪武十七年敕每月朔望祭酒以下行釋菜禮郡邑長以下詣學行香 按北齊每月朔望祭酒博士諸生展拜階下郡縣朔朝朔日行禮始此其後遂以朔望行香朱子曰謁宣聖焚香不是古禮捻香不當叩頭只直上捻香卽出笏叩頭而

拜由是觀之則宋亦然矣但儀節與今不同今只行拜禮出此
澄海縣志東陽王嘉忠著

海岱門火藥

康熙甲子秋九月海岱門內地中忽作聲有光如電初以爲地震也已知其地舊埋火藥覆大石板上土厚尺餘不知何故忽發飛石所中凡傷二百餘人

二雨辨

無錫邵文莊寶二雨辨云雲興於山勃然滿盈旣蘊而降以雨者山雲也謂之山雨雲興於海倏然灑漫旣翕而盛以雨者海雲也謂之潮雨海雲之雨乘風以行雷鳴則止山雲之

而扶雷以動風吹則散海雨春少而秋多山雨夏多而秋少

日本小歷

宏光初有携日本小歷一紙來者字體並從本國書首題寬
永二十一年及大將軍等字

石經山藏經

房山縣石經山峰巒秀拔名小西天隋大業間僧靜琬懼本
教有難不能流通發願募工鑿石刊造一大藏經積於此山
至唐貞觀初僅成大涅槃一部靜琬沒後其弟子遞刊造餘
部歷遼金始完一大藏貯於巖洞者七地穴者三洞鍵以石
門穴鎮以浮圖自來兵燹不之及

二郎神

二郎神卽嘉州守趙煜斬蛟者也不知何代封爲清源妙道眞君

泰山之高

泰山自下至巔五千二百八十四步

五尺爲一步

紆折皆在其中高

三百八十六丈九尺一寸實十四里零八十餘步應劭漢官儀云自下至古封禪處凡四十里者妄也有泰山道里記沁水張大理五典云

飛來峯佛像

雲隱飛來峯元僧楊璉眞伽徧鑄佛像明嘉靖朝太守福清

陳仕賢壬辰進士以楊及鄭僧聞僧三石像斷其首瘞獄中獄中大瘕或云誤毀佛像也

入蜀三谷四道

入蜀有三谷四道西南曰褒谷從褒入南曰駱谷從洋入東南曰斜谷從郿入其所從皆殊舊志謂首尾一谷者非也其棧道有四從成和階文出者爲沓中陰平道鄧艾伐蜀由之從兩當出者爲故道漢高帝攻陳倉由之從褒鳳出者爲今連雲棧漢王之南鄭由之從城固洋縣出者爲斜谷道武侯屯田渭上由之丁卯吾鄉許編修典四川鄉試欲強余同往余不果行爲詳考道里以當贈行之篇

甲申京師之變

甲申京師被陷始末詳談孺木金陵對泣錄中今全錄於後云光祿寺署丞膠州高宏商自賊中脫歸秋末省其兄相國備述前厄云三月己丑朔甲辰上召考選中外官三十三人於中左門諭曰國家多事南寇北虜聞寇已薄固關雖無確報可謂迫於門庭朕已修省待咎此時何以撲勦何以安人心何以生財何以足用爾等其熟計之滋陽知縣黃國琦首對曰賊之驕由於招撫從來招撫無裨於事上問安人心對曰安人心不難在於聖心聖心安則人心自安上首肯筆記其名又問生財對曰今生財云加派云捐助俱非也豈非一

而再而三乎皇上宜搜內藏盡所有以爲外用上又首肯
因問用人對曰天下未嘗無人但人未必爲用上大是之立
除兵科給事中餘以次對未畢俄傳外札上手折視訖倉皇
遽退各官不敢散已傳駕回宮各官乃散知賊已至昌平也
各官環閣臣於御河橋楊觀光等責以城守事魏藻德曰大
家做靠不得一人是日內閣課庶吉士東宮日講官劉理順
何瑞徵講論語首章未竟賜茶退夜二十刻部推左懋泰戎
政兵部右侍郎總督城守未報乙巳閉都門時傳吳三桂兵
至不知卽賊也夜攻阜城門卽平則門并廣寧門卽彰義門西便門渾
下二十刻砲聲漸急丁夜砲愈急賊環攻有旨城堵尙虛一

千八百守卒俱稱無餉襄城伯李國楨不登陴丙午巳刻賊入阜城西便二門人不知也丁未昧爽市人云宮女出西華門或傳聖駕作出城辰刻宣武門北有內臣戎服可千騎云王太監救火呼開門答以鑰在中府擊之鎖未破碎或云前門開遂沿正陽門至則被大砲不可近自長安右門還宮巳刻賊入宣武門肆掠內臣被禍尤慘李自成射承天門題榜矢中天字上馳入宮午刻僞示五城購車駕所在戊申午前傳先帝自盡於煤山僞諭明朝大小官員俱限次日赴各將軍帳下具職名彙冊送覽願復官者量材擢用不願復官者草職爲民准給路引卽放回籍敢有匿而不報兩隣長班房

主一併誅戮自是各官俱分授職名權將軍李友家自己至酉共報七十三人劉斯球等其去者以革職回籍也主賊錄職名籍貫履歷寓舍僮婢長班錄訖皆驅對廳鋼之工部侍郎陳必謙不卽入擊以輿槓己酉先帝后移東華門席舍武選主事大足劉養貞出私錢八千得柳棺殯之先帝不幸時首露纏右足靴身衣短後布衣胸題朕旣喪國無顏冠冕見人是日同先后長椅舁出先后衣笄甚肅鼻微傷其裳紉給越三日賊出梓宮二一丹漆一點漆收殯焉先帝翼善冠龍袍玉帶滲金靴先后袍帶亦如之定王騎驪來臨不敢哭而去次東宮亦騎驪至青衣褻帽觸地良久雖不哭隱痛不能

起賊擁之去諸臣臨哭可四十餘人臨而不哭者三十餘人
養貞日侍側哀毀被執至李友家友據印字緘衛許錦衣宅
年五十餘性兇悍所錮各官許家人傳餐印其面而入出卽
去癸丑薄暮李友傳各官各據朝本朝見光祿寺監事林蘭
友問朝本何若有佐史吳某云紅摺黃面開職名朝見蘭友
如其言餘仿之刑部尙書張忻言黃摺非所用付紅單職名
西刻李友列騎七十三隊隊騎各五露刃押諸臣赴窩鋪偽
將劉宗敏押千六百餘人夜半叱起俱蓬垢人予匹馬飛馳
入西長安門過御河橋皇王夾道進東華門始知非朝也至
會極門僞相牛金星深衣盤坐棕毯上面東向右侍郎宋企

郊盤坐金星側北向金星據縉紳錄一部硃筆點唱先令甲
科打恭餘誦鄉貢誦高聲以應或託疾則令扶候台選卽圈
於錄上赴部聽銓選注畢日各回營奔仆數人乙卯又選各
官昧爽由午門入會極門牛金星宋企郊如前唱選預名者
令候會極門否則出東華門或令出西華門不解其故蓋東
皆回營西皆斬於門外凡七十六人多勛戚丙辰各營拷職
官追贓內臣加炮烙尤慘劉宗敏家論官大小勒限贓完日
釋之李友等各混拷不勒限李友家七十三員選用二十九
人聽其自指夾傷十之四劉養貞再夾惟呼太祖高皇帝追
四十三兩又銀盃二又徵之不應曰我寧死也王都等杖斃

黨崇雅除通州倉場侍郎來謁李友角巾綠衣諸人就問竟
感額不答中書科舍人吳橋沈某始被拘佯風疾時呼流賊
來殺流賊屢受鞭不之拷四月二十二日同釋四月戊午朔
乙丑黃紙傳二十七日卽位塘報吳三桂舉兵逼京師戊辰
李自成馳僞敕及吳襄手書招之三桂碎其敕擲父書不啓
斬從使四人釋回一人自成聞斬使大怒召李友等點兵站
隊庚午自成脅東宮二王及吳襄東行步騎三十七萬戊寅
吳三桂擊自成敗僅四萬騎回京步卒盡沒賊將李付宇
所部萬三千人才還騎十七庖人一家丁二云經戰十三年
未有如此之敗者癸未午刻李自成回京入德勝門從馬約

七千匹列東華門二十騎自御道入前一賊抱嬰兒不知何人也是日故學士楊觀何瑞徵光祿少卿李天經李延鼎同鴻臚寺官八人勸進自成曰事且亟何登極之有劉宗敏厲聲曰已有旨明日登極各官可出料理各官退宗敏與自成爭曰爾幾十年辛苦一旦敗壞若不登極何以回關中自成默然甲申果僭號先燬太廟主從此壞民居運入大內爲纂具丁亥卯刻賊出阜城門留卒七百餘人入大內及各巷縱火高宏商拘李友家被夾勒四百金詹事張維機主事蕭鴻基至夾其首張尙書鳳翔前出獄被拘勒四百金不夾

中書自經

李自成入燕後拘明朝大小官員分營追賄有中書十數人同拘繫一室忽傳偽旨是夜俱令自經鐫鎖甚密外嚴兵守之各官以次雉經氣絕縊斷大半墮地伏尸相枕藉蘇州申濟芳獨逡巡不就縊天黎明聞守者啓鑰入申急迫伏積尸中詐爲死狀一守卒云生死未可知當頭人與一棍連梃數人忽一卒云料此輩已無生理鞭屍何爲遽舍之出午後命各家僮識認尸首負歸殯殮申竟得脫後年八十餘卒於家太倉唐寔君爲余說

福藩監國

甲申四月京報絕月餘留都疑阻十三日有中人夜至內府

云京師三月十九日已失守明晨張總憲豹山

愼言

偕御史

周元泰朱國昌郭維經米壽圖至高司農宏圖確齋所少頃
確齋及史尙書可法呂侍郎大器姜詹事曰廣集議監國首
福王或云潞王時並僞淮安高張之意屬於洛陽史頗不然
之意在衛輝恐北耗未確尙爾逡巡俄奏差回自都下云三
月十六日手菜筐逃出京其夕炮聲遠震迨旦寂然餘不知
也諸人唯唯各散二十二日史尙書以三千騎勤王渡江俾
呂侍郎攝禮部印越三日史尙書述諸臣往江浦議事侍郎
得史手札卽傳示諸公素服會清議堂謀葺武英殿二十七
日有中人奔南備悉凶問是日告奉先殿姜詹事撰文高尙

書舉筆云神宗皇帝之第二子第一籓云云而史尙書札至
意專衛輝尋又札云洛陽衛輝並南下當拈闔孝陵之前云
云無何總督鳳陽馬士英書來奉福王發淮安將及矣卽日
守備南京太監韓贊周出迎二十九日王舟泊燕子磯明日
抵龍江關先召見列侯次尙書史可法高宏圖程註都御史
張愼言同謁舟中王左手挈史右手挈高跪泣答之角巾衣
葛坐榻上衾枕俱倣蚊幃不具五月朔登三山門環城而東
謁孝陵自朝陽門入經東西華門宿外守備廳四日監國傳
諭天下是役也南都始議未定馬士英成之史尙書前督鳳
陽稔知福王子湛於酒色徐魏公宏基值高尙書於皇城下

曰事亟矣惟賢是立何論序乎史在高郵聞福王舟近卽列
諸臣名啓迎或云士英初意亦不專洛陽與史尙書同偶值
福王舟掩而南背其始議後謂臣以兵十萬護蹕臨江欲駕
南都諸公之罪給事中李沾謂告廟文出臣筆皆非其實也
宏光年號

南渡年號閏擬定武宏光拜天樑籌得宏光冢宰張勳山曰
光字上於文爲火清朝年號曰治從水水能剋火奈何果如
其言

馬士英忌史

馬士英挾迎駕之功自江北來朝不欲出鎮故事輔臣必有

入閣辦事之旨士英特繫銜大學士非內任也竟據政府史
相國因自請出鎮鑄督師輔臣之印士英忌史聲望遠出已
上又史先陳士英有福王不忠不孝之語士英意脅之史求
還故牘終不相忘掣肘陰螫以勞勩難泯遂移構新建姜相
國謂觀望異議冀并陷史也

燕京從逆

燕京從逆諸臣留都傳報不一其最著者鄉人乘恕輒馳檄
督同姑蘇則首項煜錢位坤宋學顯湯有慶常熟則首時敏
皆焚毀屋廬尋臺臣嚴禁御史刑彪佳撫安蘇松常鎮誅首
亂六人乃止

阮大鍼復用

桐城阮大鍼初附東林與嘉善魏忠節爭吏掌科因投逆璫歷太常少卿坐黨避禍金陵稱詩好客素善內臣馬應芳馬士英僑南都時時過從南渡初總憲張藐山改冢宰奉詔言逆案置弗用大鍼計沮嘆誠意伯劉孔昭拉勲臣廷攻冢宰專右文臣自是冢宰四疏乞休士英密薦大鍼言其知兵立除兵部右侍郎召對以高相國廷爭臺省交論未拜命而心益急士英令徐侯之及涖官每朝罷輒手招士英就語自示於諸紳中日同士英輩狎飲後常熟錢侍郎附焉錢寵姬柳如是大鍼請見貽以玉帶曰爲若覓恩封談孺木云

馬阮孔昭誤國

張藐山冢宰去後誠意伯劉孔昭之權日甚自謀入相不得乃薦兵部侍郎德清蔡奕琛南都之禍始於誠意潰於馬士英阮大鍼

韓贊周

司禮韓贊周字象雲賢內侍也宏光帝始而憚中而疏末且厭之嘗盛暑擊毬三人交筵不休贊周凝立不動十二月西宮成臨御上色不怡贊周請其故上曰無佳優人奈何贊周泣曰臣意官家思先帝乃如此抱恨乎上嘗責太監馬永芳爾但知叩堂安知我叩堂指贊周也

黃澍

黃澍本歙人年少輕狂作葉子格品第宗婦之貌見擯於族走杭州冒籍郡庠丙子舉於鄉明年成進士授開封推官壬午禦流賊開渠轉粟河水秋溢遂灌汴城禍自開渠始又搜民間藏粟併金錢奪之汴人切齒及內召烈皇帝面問開渠者誰也委之流賊利口迅召人莫能難以御史按楚未及瓜遽入朝意覬開府廷劾馬士英責數其罪宏光帝色動云黃澍言之有理顧高相國記之士英跪階下惶愧欲死出因行金結納內臣張執中等蓋平賊將軍左良玉嫌馬氏故大言清君側之惡澍出良玉手書挾鎮重以叔之及澍還按楚士

英陰遣人購良玉而澍孤矣尋免其官畏禍匿良玉所女歸其子明年良玉稱兵犯闕實澍爲之厲階也

僞太后

乙酉五月南都敗士英出逃至孝陵詭飾其母爲太后召守陵黔兵自衛所過刼掠一空從廣德州走安吉知縣黃翼聖掃衙舍以停僞太后及士英家眷浙撫張養貞下檄安吉問太后眞僞翼聖啓云閣部旣眞太后亦非假張遂備法駕迎入杭州僞太后駐朝天門東李總兵宅士英屯兵湧金門外王氏園潞王恭謁太后如常禮辭之已令妃具宴入送妃躬詣陪侍復峻辭之日夕惟與士英妻及婢數人相處人始疑

其僞 本朝兵將至士英走台州魯王監國訪太后不得會
稽熊少卿汝霖責士英不扈皇上乃母后之狗乎士英無以
應

劉念臺

戢山劉先生前削籍家居南渡起左都御史入京不携冠服
先馳疏自稱草莽臣歷指時事之失內及逃將封爵貴陽及
劉澤清忌之蓋劉自臨清南遁謂中其隱各疏攻先生澤清
疏并列左良玉黃得功劉良佐高傑名請加以重饒實各鎮
不知也先生至南京借冠服赴任士民鼓舞稱快羣瑞亦曰
劉先生君子也恐不得久耳果卽引去

宏光演劇

甲申秋南教坊不足充下陳私徵之遠境阮大鍼楊文驄馮可宗輩各購進大內當演麒麟傳奇劇未終妓人首戴金鳳者三蓋宮中例承幸者戴金花以自別也

南都選宮

甲申九月南都有選宮之命皇太后自於外守備廳擇六人未曉命再選初各官皆愼其後會於貢院狎笑褻視選七十餘人寢及蘇杭太后侍女金花年十八來自中州殊色也所選並不逮上待如妃禮明年阮大鍼入其宗女雖殊麗究不知誰氏也又書佐周某獻其女太監田成來駐杭州貢院

樹黃旗一選五人止王氏留京上之出奔也阮氏周氏王氏
命還家

宏光朝謠

宏光朝雜謠

宏光朝要做官非騎馬

上英即種田太監田成

射

人先射馬英擒賊先擒王

鐸

紅花開天子來不辦衣衫只辦

帶又聯周延儒字玉繩先賜玉後賜繩繩繫延儒之頸一

同狐狗之頭馬士英號瑤草家藏瑤腹藏草草貫士英之皮

遂作犬羊之羈自成不成福王無福兩下皆非真王北人

用牛南人用馬一般俱是畜生

倪爲丁評

倪鴻寶先生與同邑丁庠子進俱天啓壬戌進士選庶常嘗
中秋聯句丁首唱云中秋佳節好吟詩爲人所哂上偶問崩
字何義丁曰君死曰崩倪曰先帝升遐曰崩進自慚漸與倪
成隙倪少娶餘姚陳氏失歡後官尙書以妾王氏膺封誥丁
遂修怨讎誠意伯劉孔昭許其事倪奏辯陳氏失母意遣歸
外家命娶王宜封引海瑞前妻許氏潘氏弗封封繼妻王氏
爲例幸上不問倪竟以此自免歸陳氏實同母夫人居非遣
歸者甲申末陳氏訴於朝時孔昭在事奪王氏改封陳氏

四鎮

史相國分列四鎮意在收江北之援卒不得其力先是四鎮

兵各餉六十萬高傑最強悍黃得功劉良佐次之劉澤清爲極弱史於揚州大會諸將下拜求出師傑雖跋扈頗感動遂率眾而北傑至睢州爲許定國刺死中旨切責之定國畏罪導本朝兵南下

戶上書圈

乙酉三月初九夜嘉興府城內外居民戶上各有書圈或紅或白或書上或書日或斜書雙曉起驚異不知所自至閏六月羅兵燹惟白圈白書之家不火徐敬可云

楊文聰

楊文聰字龍友貴州舉人不第宰青田量移江寧癸未蕪湖

兵擾西征自效事平仍返縣任張藐山改都御史疏劾文驄
榜其文不令視事明年夏馬士英入相文驄以甥壻起鎮江
推官未行擢職方主事尋監軍鎮江明年五月拜巡撫僉都
御史一日遽南遁時總兵鄭彩方陳列江上聞之兵立潰宏
光帝聞報卽出奔追曉馬士英亦逃南都亡

童妃

宏光卽位語輔臣以先後妻如三時方訪母后於中州未及
宮省御史陳潛夫按河南以童氏至有司護送入京年殆三
旬坐詐冒下錦衣衛獄童氏從獄中上書云某年月日娶我
某年月日陛下出亡所衣某色所飯何品所出何地又首帕

妾所加也云云此書不知緹帥馮可宗作何狀獄上後傳聖諭有與潛夫同卧起之語絲綸之地豈應汙褻若此耶聞澤清婦劉氏上馬士英夫人書救童氏

方國安敗降

乙酉六月 本朝兵至杭州潞王常淂張秉貞以城降雨浙風靡總兵王之仁守定海上其印都督方國安自杭走金華與朱尙書大典台兵尙書以方兵剽詐不許遂相持會山陰太學鄭遵謙倡義兵熊少卿汝霖孫職方嘉績應之寧波則刑部員外郎錢肅樂浙東響集迎魯王於台州西築土城守江國安東下富陽其下分屯金村嶺朱橋其屯朱橋則國安

兄于元振也號土漢營大總兵萬餘船五百餘沿朱橋列柵至轉塘口左江右山或說之曰山路莫要於西溪而橫山大嶺扼其衝旁多間道叢竹可伏兵從此距營二里爲清風亭以千人據之且西接五雲天竺可俯瞰杭州益張疑兵連合江東縱復不利豈能越險薄我營哉元科不以爲然元科亦國安兄子戎旗營三總也八月元科以三千騎直趨六和塔明日戰於清風亭江東兵莫敢登岸越三日 本朝兵自六和塔來攻國安浮江身自督戰自晨及晡國安失利 本朝兵覬橫山清風亭俱無伏九月旣望以八百騎自清風亭五百騎自橫山夜去營一里乘勢奪橋橋偏塞門守兵皆走元

料手斬數人攖柵力戰 本朝兵登廟山望柵中白牆不相
屬遠發砲牆傾大呼馳入方兵大潰僅得及舟而遁遂焚其
柵自是國安不復能渡江丙戌五月大將軍貝勒李羅至西
興荆國公將走台州馬士英以許封西平王勸國安降遂解
甲後與元振俱被殺

士英首逃

馬士英奔紹興辯臣非誤國又挾方國安爲重命戴罪圖功
丙戌六月朔首逃

金正希

金正希先生倡義於休寧同縣令何通武遣諸生朱備迎黃

樹於九江實不知樹已通款 本朝也九月 本朝帥張天祿略地且至戰失利先生與歙縣諸生江天乙同被執見洪承疇不屈遇害僧某殯之題曰赤壁金公樞扶至蕪湖閩商某薄其棺改殯焉

徐冢宰

徐冢宰虞求

石麒麟

原名文治本蘇郡諸生萬歷庚子斥場屋

赴南武闈舉第一被攻走江楚殆二十年青浦令其受業生也遂補諸生舉於鄉天啓壬戌成進士歷官介潔屢起屢忤乙酉閏六月二十六日 本朝兵下嘉興先一夕公入城聞敗自經於故第精嚴寺僧眞寶殯以米困袖有詩扇蒼頭祖

敏卿其旁先生有別墅在賀家橋南其孫顯武與予善時時過話前事所著名可經堂集

徐公墓在蔚花鎮龍山之後

東明寺異人

錢塘大遮山東明寺相傳建文曾避跡於此 本朝丙戌某月某日有二十二人皆偉幹傑貌免胄而入命守僧以米三斗作飯豆一斗作乳倉卒具食僧異之問飽未曰未也亦不敢飽飯後徧視佛像不拜見建文像則拜而下泣一人在前餘隨後不敢並已而求浴裹衣朱殷膚如刻漆人臂二弓腰二銃試烏雀不一失鎧仗重鐵度所負荷皆百餘斤其一人泣拜者挽鞭重數十斤合二僧之力僅能舉而彼運之如棕

拂竹如意問邑里姓氏不答問其聲知爲北人也問今何往
則淚隱隱承曉曰吾糧盡游觀天下無可起事者吾安之乎
曰三吳足賦可就也曰取三吳未能集事僧曰以諸公之敢
力赴義何患無成默不應諷之苦空亦不應僧曰卽出值官
兵奈何曰吾仗劍行數千里先後所值何啻百千彼烏能難
我僧曰自此天目民寨百餘所稱義師能往觀乎曰曾按視
一二所皆盜耳不足目也因問道僧述天目徑山湖州之程
曰吾之湖州曰湖州多守兵曰固欲遇守兵遂冒而去每一
人胄兩人力收之目欲迸火尋聞其遇守兵殺五百餘人而
二十二入無恙慨然嘆曰吾多殺亦何益且吾所以來豈爲

此輩哉皆投碧浪湖死外舅陸辛齋名嘉淑字冰修述寺僧指月之語

洪武科舉

洪武三年庚戌五月始詔行科舉直隸貢百人河南山東山西陝西北平浙江福建江西湖廣各五十人廣東廣西各二十五人時直隸就試者百三十二人拔七十二人見考官宋潛溪鄉閭紀錄序試錄曰小錄按登科考無錫俞憲所輯中載在京鄉試直隸府州一百名河南山東山西陝西北平浙江福建江西湖廣廣東各四十名廣西二十五名與潛溪集微有不同又按登科考洪武三年庚戌鄉試辛亥會試以後

至十七年甲子始復行鄉試而金華府志有庚戌辛亥壬子癸丑連歲開科之語紹興府志云六年金鑄榜不知何所出

雲貴開科

雲貴開科始永樂九年辛卯貴州時尙未附宣德四年雲南貴州始合試共取十一人後漸增至嘉靖十四年分定雲南舉四十人貴州舉二十四人

歲貢恩貢

府歲貢二人縣歲貢一人洪武二十五年定嘉靖十年令天下歲貢五人選其一歲貢通學考選至十五年止天啓元年鄉試一榜廩生准貢崇禎元年戊辰以登極始有恩貢乙亥

通考各學廩生拔貢一人己卯鄉試一榜俱充貢不論增附
教習之始

永樂二年已選庶吉士矣而戶部辦事進士當塗李衡以年
少自請命改庶吉士同江寧楊寧習書至宣德八年三月已
選庶吉士十一月又選前科進士能文者徐理等十三人爲
庶吉士命學士王直教習此教習之始也

弛會禁試

舊制貢士三科不第禁會試宏治三年始弛此禁

選館課

宏治壬戌科選庶吉士并修撰康海編修孫清李廷相俱課

書學士梁儲王華教習先是天順四年選庶吉士劉健等十五人并修撰王一夔編修李永通鄭環命學士劉定之侍讀錢溥教習此外鼎甲率不在館課之列萬歷壬辰後選館槩課而鼎甲不出序今與庶常一例論先後矣

第一場五義

正德甲子四川解元周洪謨丁卯福建解元陳俊第一場俱五義

嘉靖禮部條約

嘉靖初會場禮部條約許舉子帶洪武正韻一部表末不用瞻天仰聖

董穀碧里雜存

正副主考分閱

科場舊規正主考閱易書二經副主考閱詩禮春秋三經各不相涉 詞林典故

李九我

李九我舉鄉試第一中少師瑤泉卽留爲館賓轉館於歸安
董宗伯家癸未李得會元中正當國廷試時文定以子用懋
入試避讀卷是科秀水朱文恪公一甲第一李在第二賜第
後九我見秀水頗怏怏一日秀水疾李過候坐榻旁推窗見
庭松蟠屈笑曰弟嘗夢歷此境或云功名在是今得之矣名
次兄後非豫兆耶白後歡洽無間

殿試策進呈

殿試策進呈必取書法整齊無舛謬者隆慶戊辰科閣臣擬進上疑首卷有私於二甲卷首得羅萬化置第一其卷字多塗抹者

鄉試差京官

各省鄉試專遣京官始於萬歷乙酉舊土副俱教職由監察御史所聘布政使提調按察使監試彌封謄錄受卷皆有司例得讀卷有所識拔內簾無敢違者自專差朝臣內外簾始隔絕

典試差主事

典試差部主事始於萬歷甲午禮部推湖廣主試翰林院某
吏科左給事葉繼美上點葉另用工部主事莊懋華

韓敬不達

韓求仲先生師事湯宣城萬歷庚戌湯分房搜鄰房拔韓會
元時方忌湯遂并攻韓竟免官終身不達

巡撫監場

鄉場監試例巡按御史或偶缺則代以巡鹽萬歷乙卯貴州
巡撫張鶴鳴代置監試此巡撫監場之始也

斷么絕六

萬歷丙辰會元吳江沈同和文倩第六名趙鳴陽作事發二

人俱禡草京師以骰子戲謂斷么絕六

朱文恪主禮闈

天啓壬戌會試閣推何宗彥顧秉謙主禮闈上點宗彥忽及
朱養純顧疑秀水有他故頗不懌後秀水捐館顧擬謚文懿
朱公子力爭得謚文恪

廷試誤筆

廷試策偶誤筆以塗註不便例多任之萬歷己未科狀元莊
際昌醪誤膠崇禎辛未狀元陳于秦陽誤易榜眼吳偉業曠
誤驥

曾元另封進呈

殿試進呈惟會元另封此明朝舊例也今不然

明朝宗室進士

明朝宗室進士天啓崇禎兩朝共十一人釋褐後例補輔國中尉惟戊辰科新建朱統鈺選庶吉士改中書舍人復入館歷國子祭酒

同姓名張銓

萬歷甲辰進士同姓名者張銓一大名人一沁水人俱乙亥正月二十六日生科第子女皆同

莆田科甲之盛

莆田科甲最盛宋時進士九百七十餘人諸科特奏名六百

四十餘人大魁五人宰輔六人明朝自洪武庚戌至嘉靖戊子凡五十二科中鄉舉一千一百十一人進士三百二十四人狀元二人探花四人會元一人解元二十五人

鄉報急足

鄉報急足始嘉靖中其時舉子尙自備青袍後官給不知所自

選歷科程墨

選歷科程墨自萬歷庚辰錢唐人錢穀口豐寔始錢貢生官終曲靖知府

會試同門房刻

會試同門房刻始萬歷壬辰

一甲三人御批

明朝故事御批一甲三人卷用玉管筆拆卷在中樞殿左

鄉會試錄序

兩京鄉試及會試試錄序皆稱臣外省則否以考官所自序也萬歷初上摘此以問閣臣欲罪之江陵具言其故乃止其後各省錄序皆稱臣

人海記卷上終